

Ata'karitétshera Kentiòhkwa

2019 novel coronavirus (COVID-19)

Ne 31 shiieskahá:wis Tsiothórha, 2019 shiihserò:ten, ata'karitétshera rotiioténion Wuhan, Thatikahresónshne iahontewennániehte tsi niiawén:'on tsi rotitsina'kwanóhston rotinonhwaktaní:hen. Tekaiat'oréhton tsi á:se coronavirus né:'e takarihón:ni, ne ratina'tónhkwa ne 2019 novel coronavirus tóka'ni COVID-19, né:ne iah ohén:ton ken'niiawén:'on tekatshénrion ne onkwè:takon.

Nahò:ten né:'e ne 2019 novel coronavirus? (COVID-19)?

Coronavirus'shón:'a né:'e ne kahwatsirowá:nen ne kanhra'shón:'a né:ne kontikwénies aontakontirihón:ni ne kanonhwakténhsera kwah né:ne teiakothoriahseriiòn:se táhnon sénha ióhteront iontón:ries nikanonhwaktenhserò:tens kwah né:ne teiakaonriò:rarak, iakotsina'kwanóhston tóka'ni severe acute respiratory syndrome (SARS).

Ne 2019 novel coronavirus (COVID-19) tkarihón:nis ne iontón:ries kanonhwakténhsera né:ne Hubej province (Wuhan), Thatikahresónshne tiotahsawáhkwen.

Ne tiotierénhton tsi niiawén:'on tsi kí:ken iakononhwaktaní:hen Kaniatarí:io nón:we né:'e kaienteré:'on ne Tsiothorhkó:wa 25 shiieskahá:wis, 2020 niihserò:ten.

[Ne sénha aesató:kenhse ne 2019 novel coronavirus aorihwà:ke, ia'skwáhtio ne Ontario.ca/coronavirus.](https://www.ontario.ca/coronavirus)

Nahò:ten ionttó:ka's?

Tekiatti:hen nahò:ten ionttó:ka's – kwah né:ne iakothoriahseriiion'se'kó:wa táhnon ó:ia thikén:'a í:ken iontón:ries nikanonhwaktenhserò:tens – nok sénha kaniakátste, táhnon enwá:ton né:'e akénhake ne:

- iako'tonhkwárhos
- ionhshà:kha
- iakonoròn:se aiontónrie

Tsi takarihwaiehstánion ne 2019 novel coronavirus enwá:ton teioterien'thá:ra akénhake, kwah né:ne aietsinà:kwanohte tóka'ni enwátka'we tsi iotiió'te ne otstíéhseri, táhnon sewatié:rens tsi níiá:wen's, aiáiheie.

Tóka' nahò:ten sattó:ka's sénha sonnhaksà:tha tsi ní:ioht ne athoráhsera (ne karihwaráhston, iako'tonhkwárhos, ionhshà:kha, iakonoròn:se aiontón:rie) **táhnon** tesatawenriéhon tsi nón:we nihotíia'tawén:'on¹ tsi na'tekiátère ne 14 niwenhniserá:ke tsi náhe tontáhsawen nahò:ten sattó:ka's, sheiatewennáta'ahs ne Telehealth Kaniatarí:io ne 1-866-797-0000 tóka'ni sheiatewennáta'ahs ne ata'karitétshera rotiió'ténion ákta tsi nón:we tehsi:teron (health.gov.on.ca/en/common/system/services/phu/locations.aspx). Orihwí:io sewennò:rok nahò:ten sattó:ka's táhnon tsi nón:we tesatawenriéhon, ne ò:ni tsi níiohwentsiò:tens sakwáhthon.

Tóka' tsi nón:we nihotíia'tawén:'on na'tentéhsewe, ta'nón:wa tká:konte ahsatatia'tatsihskwahte ne 14 niwenhniserá:ke nikari:wes. Ta'nón:wa ákta íhse'skwe ne 2019 novel coronavirus tsi nikari:wes tesatawénrieskwe táhnon tóka' ahsi'terón:tahkwe táhnon entehsón'neke tsi níiohkà:te ákta ísene's ne ónhka'k ó:ia né:'e enwá:ton akaié:nawa'se taká:tahste sénha aonterénia'te. Takí:tenhre sheiatewennáta'ahs ne ata'karitétshera rotiió'ténion ákta tsi nón:we tehsi:teron (health.gov.on.ca/en/common/system/services/phu/locations.aspx) ne aiesa'nikòn:ron.

Tóka' tesatonhwentsiò:ni kwah óksa'k taiesáhsnie'ne e'thóhtsi 911 ahsatewennáta táhnon sewennò:rok tsi nón:we tesatawenriéhon táhnon nahò:ten sattó:ka's.

Oh ní:ioht tsi waterenià:tha ne kánhra?

Coronavirus'shón:'a konterenià:tha ón:kwe tsi níio:re ón:kwe nó:nen ákta rón:ne's, ne karihwaráhston, kanónhsakon, tsi thotiió'te tóka'ni tsi tehshakotíhsnie's.

Oh ní:ioht enwá:ton akatatia'tanónhstate ne tóhsa akenhraié:na ne 2019 novel coronavirus?

Iah othé:nen teká:ien ne vaccine ne aiakoia'tanónhstate ne tóhsa aiakoié:na ne 2019 novel coronavirus.

¹ Takí:tenhre ia'skwáhtho ne Ontario.ca/coronavirus ne aesató:kenhse tsi nón:we nihotíia'tawén:'on.

Enwá:ton nia'té:kon naié:iere ne akaié:nawa'se taká:tahste tsi enwaterénia'te ne kanhrón:nis né:ne tkarihón:nis ne iontón:ries kanonhwakténhsera.

Ná:tsier kí:ken niiorata'tshera:ke ne aontahsón'neke tsi ta'nón:wa kánhra aesaié:na táhnon senónhstat ne sata'karitétshe:

- iotkà:te sahtsioharè:tahkw ne onoharè:tha táhnon ohné:ka tóka'ni kahneka'shátste ionnià:ton ionhtsioharè:tha
- senentshò:kon tesén'tsionk táhnon sáhsha'k
- tóhsa skahrà:ke ahsié:na, se'niòn:ke tóka'ni tsi thsakà:ronte
- tóhsa tetsiatera'né:ken tsi niiá:kon iakononhwáktani
- tsi'terón:tahkw tóka' sanonhwáktani

Tóka' tesatawenriéhe tsi nón:we nihotia'tawén:'on ne coronavirus, orihwí:io tóhsa niaháhse:

- tsi nón:we ate'shén:na teiontká:nere niá:ien kwah né:ne tsi thatiyénthos, tsi thonatenahskwakè:ron táhnon tsi nón:we konwarióhstha
- ákta ne katshé:nen/kárió (iónnhe káton iawenhé:ion), ne kwéskwes, kítkit, sórak táhnon watatewenni:io otsi'tén:'a
- tsi nón:we wani'taién:tons tóka'ni wanistiá:ke's ne katshé:nen/kárió

Aón:ton ken taiónktsien'te ne 2019 novel coronavirus?

Iah othé:nen katokénhston tekanonhkwa'tshera:ien ne taiétsien'te ne coronavirus'shón:'a, táhnon iah othé:nen teká:ien ne vaccine né:ne eniakoia'tanónhstate ne tóhsa aiakoié:na ne coronavirus'shón:'a. Thóha akwé:kon ne ón:kwe né:ne thikén:'a í:ken coronavirus rotinonhwaktanihen rononhá:'ok enshatiié:wén:ta'ne.

E'thóhtsi:

- é:so shnekì:ra
- satoríhshen táhnon sén:tahw tsi ní:kon enhskwé:ni
- sate'nién:ten iontonristáhkwa tóka'ni ionneka'tarihen satia'tóhare né:'e akaié:nawa'se tóka' sania'tanòn:waks tóka'ni sahshà:kha

Oh káti tóka' wakonnháksen tsi náhe tewakatawénrie tóka'ni iotohétston taontá:kewe?

Tóka' aesanonhwákten tsi nikari:wes tesatawenriehonhátie tóka'ni iotohétston tentéhsewe, tóhsa akó:ren ieia'tákta niaháhse táhnon ia'satewennáta ne Telehealth Kaniatari:io ne 1-866-797-0000 tóka'ni ia'sheiatewennáta'ahs ne ata'karitéshera rotiioténion ákta tsi tehsi:teron (health.gov.on.ca/en/common/system/services/phu/locations.aspx).
Shehró:ri:

- nahò:ten sattó:ka's
- tsi nón:we tesatawenriéhon tóka'ni sen'terontáhkwen
- tóka' ákta ieséhton ne katshé:nen (ne karihwaráhton, sakwáhthon tsi thonatenahskwakè:rons) tóka'ni ieia'tákta ieséhton né:ne iakononhwáktani

Tóka' sattó:ka's tsi sanonhwáktani tsi nikari:wes teká:tens tsià:ti Koráhne iáhse tóka'ni nó:nen aontahsatatià:thewe, sheiahronkhà:ten ne teká:tens iekhwahérha tóka'ni ne Koráhne teierihstiiákstha iakoio'ténion.

Sató:kenhs ne teiontawénries iakohronkha'tén:ni ne aorihwà:ke ne 2019 novel coronavirus tsi nón:we ne travel.gc.ca/travelling/advisories/pneumonia-china.

Oh nakátiere tóka' ónhte í:kehre tsi wa'kenhraié:na?

Tóka' othé:nen enhsáttoke né:ne 2019 novel coronavirus ionttó:ka's, sheiatewennáta'ahs ne Telehealth Kaniatari:io ne aiesa'nikonhrawihon 1-866-797-0000 tóka'ni sheiatewennáta'ahs ne ata'karitéshera rotiioténion ákta tsi tehsi:teron (health.gov.on.ca/en/common/system/services/phu/locations.aspx).

Orihwí:io sewennò:rok ne nahò:ten sattó:ka's táhnon tsi nón:we tesatawenriéhon, ne ò:ni tsi niiohwentsiò:tens sakwáhthon. Tóka' tesatonhwentsiò:ni óksa taiesáhsnie'ne, ia'satewennáta 911 táhnon sewennò:rok tsi nón:we tesatawenriéhon táhnon nahò:ten sattó:ka's.